

licentia, per quella via vene se ne ritornò con la sua armada, e andò verso Taranto a soccorso di Spagna, *demum* andò in ponente. Or el zeneral a di 5 si dovea levar di Corfù per andar a trovar l'arma' di Franza, ch'è in le aque di Cao Malio, aspetando el suo capetanio, gran maistro di Rodi; e uniti sarano queste 4 armade; Franza, Spagna, Portogallo et la Signoria di Venexia, si dice anderano a prender Metelino, come per avanti francesi feze intender era el suo desiderio. Ma la venuta di ditte armate è stà tarde, e per tal rispetto pochi fati si potrà far, perchè i tempi comenzano a pesar. *Item*, a di 3 octubrio, li capetanij nominati di sopra dismantano in terra a Corfù, per andar a messa; ai qual fu fato le debite salutation e di le nave e di le galie nostre; et dimàn, udito messa, partirano unite per andar a trovar l'arma' francese. *Item*, a dito capetanio portogallese è stà fato un presente, per il zeneral, di bote X vino, 4 botte di moschatello, 6 bote dil paexe, boi e vedelli, numero 8, confetion e siropi im pignate e altre cosse, et cofini 15 pan fresco e uva e altri refreschamenti e polli para 80.

Et sier Piero Lion, baylo et capetanio di Corfù, di 4 octubrio, scrisse *ut supra*; et che a di 30 septembrio le dite do armate zonseno li; e, perchè dita armata havea bisogno di molte cosse, dimorono li a Corfù molti zorni; e il tanto tardar a conzonzarsi con quella di Franza è da pensar sia per qualche zolesia; *tamen* zà molti di è stà mandà sier Alvi xe Loredan, provedador di l'armada, con 7 galie, per notifiehar tutto a l'armada di Franza. E l'altro zorno seguite, un pocho di schandolo in terra fra 77* portogalesi e corfuati; et, si esso baylo diferiva più a ussir di caxa, si aria auto da far assai; et si aria che dir di questo 100 anni, *ut ille inquit*; la cossa si aquietò e trovò corfuati molti obedienti. *Item*, Corphù è reduto forte e in bonissimi termini, pur manca qualcosa a redurla perfeta.

Copia de una letera di sier Filippo Contarini a sier Vctor Querini, di sier Piero, data in Alexandria, a di 4 septembrio 1501.

De qui el paëse è a pezor condition che 'l fosse mai, per le concorentie de questi signori, le qual sono la total ruina dil paexe. L'è stà manzà fin qui a Luro Sebrauli e Zile ducati 50 in 60 milia dal soldan, tra lui e so padre; e questa è stata per la prima tirata; gli altri spuderà l'anima e la vita; sì che, per quel posso intender per el tempo stiti al Cayro, el fato suo è spazato *etc.* Specie al Chajero sono in pre-

sio, piper ducati 90, zenzeri beladi, ducati X, mechini 7, garofalo 66 in 70, canelle 38 in 40, noxe 34 in 36, mazis 55 in 60, incenso 7, verzi 7 in 8, lache 24 in 26, galanga 30, endegi 18 in 20 *etc.*; merce al Cayro, ogij ducati 40 in 42 el canter, savoni 40, rami in pani 6 $\frac{1}{4}$, rami in verga 6 $\frac{1}{2}$, rami lavoradi 11, banda larga 7 $\frac{1}{2}$, raspada 8, arzenti vivi 5, cenabrij 9, stagni 18 in 20, gripola 2 in 3, rixegale 5, cofolo 12. De le specie nove fino qui non è zonte, ma sarà *de brevi*, e sapereti la quantità et sorte. Non vojo restar de scriver quello è seguito fina stiti al Cayro, perchè non se à venduto nè comprato, ma tutti mori tien suo botege serate; e mamaluchi ogni zorno chavalechano per fino al castello, per haver la so zomechia de ducati 100 per uno, e non se va senza spavento. Aspetasse la caravana de la Meeha; subito zonta, zercherò quello farà per mi e spazeromi. E molti, per non perder la vita, sono ritornati, per le grande combustion e guerre fanno ogni zorno mamaluchi, per voler la sua paga de mexe in mexe. I qual sono da 11 in 12 milia mamaluchi, cossa da no creder, e pensative a voler dar ducati 100 per uno, bisognerà trovar un gran dinaro. Non resta el soldan con tutti li boni modi de cavar danari da tutti. El qual fece far crida, che tutte caxe, botege e zerme del Cajero e quelle è nel suo paexe, che navega, havesseno a pagar, per quanto le fosse stimate, tanto al viazo, quanto le trarà per un bon viazo; e cussi le caxe e botege pagasse el fito de un anno, per quanto le fosse stimate poder trazer. Inteso el populo el comandamento comenzò a mormorar. Visto el soldan non poter operar senza mormoration del populo, una note mandò el luclì per la terra, con 300 mamaluchi ben armadi, con fuogo, e circondò tutto el Cajero infino a Bulacho, e quanti che trovono per le strade tajono per mezzo; e fonno morti per li bazari e per le strade corente da 40 in 50 homeni. I qualli messeno non pocho teror a tutta 78 la terra; sì che da poi tutte le zerme hannò pagato, grande e pizole, per quele le è stà stimate poder trazer per un viazo; e de questo àtrato danari assai; e poi le botege à pagato el fito de uno anno e parte di le caxe. Tanto è stato questo teror, che per molti zorni non fu averto lo bazarò, salvo quello de le pacie, e tuti i merchadanti mori erano scosi, salvo Ameth Bubacho, che, per esser zerman de l'armiraio, andava per la terra. E, non restando ogni zorno mamaluchi da cavalchar, a tanto che tuti li signor mori in castello è acordati insieme, e comenzò a bandir del Cajero *de primo* tutti li mamaluchi del soldaneto e quelli del scldan se atrovava al tempo